

Quityi nu nguscua San Pedro ndyaa ca slo ñatị ji'ị Jesucristo nu ndi'ị tyijyu'

1 Pedro laca na' nu nscua na' quityi re cha' cāa slo lcaa cu'ma nu ngusñi mā cha' ji'ị Jesús, cu'ma ngu' nu ndi'ị tyijyu'. Ntsu'u cu'ma nu ndyalaa mā nde loyuu su cuentya Ponto; xi xa' la tya'a cu'ma ndyalaa mā nde loyuu su cuentya Galacia, jua'a loyuu su cuentya Capadocia, jua'a loyuu su cuentya Asia, jua'a loyuu su cuentya Bitinia cua lye tsa ngañi mā. Cña nu nda ycu'i' Jesucristo 'na, bi' laca cha' tsa'a na' chcu'i' na' cha' ji'ị Ni lo'o xa' la ñatị. ²Tya clyo la cua jlo ti' ycu'i' Ndyosi Sti na lcaa ña'a cha' nu caca nde loo la, bi' cha' ngusubi ycu'i' Ni ji'ị mā. Lo'o juani ndyu'ni Xtyi'i ycu'i' Ndyosi cña cha' tyanu lubii cresiya ji'ị mā, cha' taquiya' mā ji'ị ycu'i' Jesucristo; na cua ngujuii yu lo crusi xqui'ya cu'ma, ndyalú tañi yu cha' caja ñi'ya caca lubii cresiya ji'ị mā. Lo'o juani nti' na' cha' ña'a ti tya cua'ni ycu'i' Ndyosi cha' tso'o lo'o mā, cha' jua'a ti ti tyi'ị tyiquee mā lcaa hora.

**Ndu ti' na cha' caja chalyuu
nu ná nga'a cha' tye ji'na**

³Cua'ni tlyu na ji'ị ycu'i' Ndyosi, la cui' bi' laca nu ndu'ni tlyu

Jesucristo nu Xu'na na ji'ị, la cui' Sti Jesucristo nu Xu'na na laca bi'. Tya'na tsa ti' ycu'i' Ni ña'a Ni ji'na, bi' cha' ngua'ni cucui Ni cresiya ji'na; ntsu'u chalyuu cucui ji'na juani, xqui'ya cha' ndyu'ú ycu'i' Jesucristo chaca quiya' nu lo'o ngujuii yu. Lo'o nu juani cua ndu ti' na cha' caja chalyuu nu ná nga'a cha' tye ji'na, ⁴xqui'ya cha' cua ngua'ni lyaá Jesús ji'na. Ná ntsu'u ni sca cha', ni sca ñatị nu taca cua'ni ñu'u ji'ị cha' nu cua ngujui ji'na; ni sca na tsiya' ti, ná ca cua'ni tye na bi' ji'ị cha' tso'o nu tyacua ji'na ca slo ycu'i' Ndyosi lo'o cua tye ti cha', ná ntsu'u na nu taca cua'ni cuxi ji'ị cha' bi'. ⁵Cua ngusñi mā cha' ji'ị ycu'i' Ndyosi, bi' cha' ndu Ni cua ji'ị mā juani cha' ña'asị Ni ji'ị mā. Ná ntsu'u ni sca na nu nguula la juersa ji'ị, nu taca ji'ị tyijjloo ji'ị ycu'i' Ndyosi; cua'a Ni ji'ị mā ji'ị nu cuxi, cha' cua'ni lyaá Ni ji'ị mā lo'o tye chalyuu re, cha' cua ndyaa Ni ngua'ni cho'o Ni su tyi'ị mā ca slo ycu'i' Ndyosi.

⁶Bi' cha' caca chaa ti' mā juani, cha' tso'o tsa ntsu'u tyiquee mā, masi ntsu'u quiya' xñi'ị ti' mā xqui'ya lcaa lo cha' ti'f nu ndyacua

ji'i mā; pana xti ti tyempo nu ca xñi'i ti' mā. ⁷Ndyacua cha' ti'i ji'i mā jua'a, cha' taca cua'ni cuayá' Ni ji'i mā, si chañi cha' ngusñi mā cha' ji'i ycu'i Ni. Jlo ti' mā cha' quiña'a tsa nga'a chcuā oro; pana hora ti ndu'ni cuayá' ngu' ji'i oro bi' lo'o quii' cha' tyalá bi', cha' ña'a ngu' si chañi cha' xcu'i oro laca bi'. Nde loo la quiñu'u chcuā oro, tye cha' ji'i, masi quiña'a tsa cña ngua'ni ngu' cha' tyubii oro bi' tya clyo; pana nu cha' ji'i Jesús nu cua ngusñi mā ni, ndulo tsa cha' bi' cuentya ji'i ycu'i Ndyosi. Masi quiña'a tsa chcuā oro caja ji'na, ná stu'ba tsiya' ti cha' ji'i bi' lo'o ycu'i Jesús. Lo'o ndye ndalo mā ji'i lcaa cha' ti'i nu ndyacua ji'i mā xqui'ya cha' ngusñi mā cha' ji'i Ni, li' tso'o tsa cha' nu caja ji'i mā lo'o tyu'u tucua ycu'i Jesucristo cāa chaca quiya'; ta Ni sca su tso'o cha' tyi'i mā slo ycu'i Ni laja xee nu ndubi tsa ca su ntucua ycu'i Ni.

⁸Ntsu'u tsa tyiquee mā ña'a mā ji'i Jesús, masi bilya ña'a mā ji'i Ni; hasta juani tya lyiji ña'a mā ji'i, pana jlya ti' mā cha' lu'ú Ni. Chañi cha' tso'o tsa ntsu'u tyiquee mā juani xqui'ya Jesús, ni ná tye chca cha' chcu'i mā lcaa cha' tso'o nu ntsu'u tyiquee mā cuentya ji'i ycu'i Jesús lo'o xa' ñati. ⁹Cua ngusñi mā cha' ji'i Ni, bi' cha' taca ca cuayá' ti' mā cha' chañi laca cha' cua'ni lyaá Ni ji'i mā lo'o cua ndye chalyuu.

¹⁰Nu jyo'o cusu' nu ngua tu'ba ji'i ycu'i Ndyosi sa'ni la ni, nchcu'i tsa jyo'o cusu' bi' ji'i cha' tso'o nu cua'ni ycu'i Ndyosi nde loo la, cha' cua'ni lyaá Ni ji'i ñati ty'a'a ndi'i na chalyuu; xcu'i cuentya ji'i ycu'i Ndyosi nchcu'i ngu' cha' bi', pana

ná ngua cuayá' tso'o ti' ycu'i ca ngu' bi' ñi'ya nu cua'ni ycu'i Ndyosi cha' caca nde loo la, ni jacua' cua'ni Ni cha' bi'. ¹¹Xtyi'i ycu'i Cristo ngulu'u lcaa cha' ji'i ngu' bi', ñi'ya nu caca ji'i ycu'i Cristo nde loo la, ñi'ya nu chcube' yu nde loyuu chalyuu, ñi'ya nu tlyu tsa cha' tso'o nu caca ji'i yu lo'o tyaa yu ca slo ycu'i Ndyosi chaca quiya'. Lo'o li' ngulana tsa nu ngu' jyo'o bi', cha' quije cha' ji'i ngu' tilaca caca nu Cristo bi', ni tsa tyu'u tucua yu nde chalyuu. ¹²Pana ná nquije cha' bi' ji'i ngu' bi' li'; sca ti cha' nchcu'i ycu'i Ni lo'o ngu' bi', cha' si'i ycu'i ngu' bi' laca nu ca cuayá' tso'o ti' ñi'ya caca cha' bi' tyempo nde loo la. Pana cu'ma ni, nu lijya chalyuu nde loo la ji'i ngu' jyo'o bi', nchca cuayá' ti' mā juani, xqui'ya cha' cua ndyuna mā lcaa cha' tlyu nu ngua'ni Jesucristo. Cua ndacha' liñi ya cha' bi' ji'i mā; chacuayá' ji'i Xtyi'i ycu'i Ndyosi ngulu'u ya cha' bi' ji'i mā, cha' cua nda ycu'i Ndyosi Xtyi'i ycu'i Ni lijya lo ya nde chalyuu. Lo'o jua'a lcaa xca ji'i ycu'i Ni nu ndi'i slo Ni, lcaa ngu' bi' nti' tsa ngu' ca cuayá' ti' ngu' lcaa cha' nu ngua ji'i Cristo lo'o ñaa yu nde chalyuu.

**Nti' ycu'i Ndyosi cha' caca
lubii cresiya ji'na lcaa tsā lo'o
tya ndi'i na chalyuu**

¹³Bi' cha' culacua xi ti' mā, tii ti' mā tyi'i mā chalyuu, cha' lcaa tsā jatya mā ji'i cha' tso'o nu cua tlyu xi, nu cua'ni Ni lo'o mā lo'o cua'ni lyaá lyiji Ni ji'i mā; jua'a caca nu lo'o tyu'u tucua Jesucristo chaca quiya'. ¹⁴Taquiya' tso'o mā ji'i cha' nu nchcu'i ycu'i Ndyosi cha' caca mā

sñi' Ni nu tso'o tsa ndu'ni; nga'aa cua'ni mā cua ña'a ca cha' cuxi nu ndiya ti' mā ñi'ya nu ngua'ni mā tya sa'ni la, nu lo'o bilya ca cuayá' ti' mā cha' tso'o ji'i ycu'i Ndyosi. ¹⁵Xcui' na lubii tsiya' ti laca ycu'i Ndyosi, xcui' liñi tsa cha' nu ndu'ni Ni, lo'o jua'a laca Ni nu Xu'na na juani. Bi' cha' nti' Ni cha' xcui' lubii tsa caca cresiya ji'i mā, xcui' cha' liñi cua'ni mā. ¹⁶Ndi'ya nscua cha' lo quityi ji'i ycu'i Ndyosi: "Cua'ni mā cha' caca lubii cresiya ji'i mā lcaa hora, cha' xcui' lubii tsa laca na' tsiya' ti", nacui ycu'i Ndyosi.

¹⁷Xcui' liñi ti ndu'ni cuayá' Ni ji'i ñati, ñi'ya laca cha' tso'o nu ngua'ni scaa ngu', ñi'ya laca cha' cuxi nu ngua'ni scaa ngu' laja lo'o ndi'i ngu' chalyuu. Bi' cha' ntsu'u cha' cutsii mā xi lo'o chcu'i mā lo'o ycu'i Ndyosi ndi'ya: "Sti ya", ñacui mā ji'i Ni. Ntsu'u cha' taquiya' mā ji'i ycu'i Ndyosi Sti na lcaa tsā lo'o tyi'i mā chalyuu, cha' xcui' cha' tso'o cua'ni mā cuentya ji'i Ni. ¹⁸Cua ngua'ni lyaá Ni ji'i mā ji'i lcaa cha' cuxi nu ntsu'u ji'i mā, bi' cha' nga'aa ntsu'u cha' cube ti' mā ji'i lcaa cha' nu nguxtyanu jyo'o cusu' ji'na cha' cua'ni na. Nda jyo'o cusu' bi' cha' bi' lo'o na, masi jlo ti' ngu' bi' cha' ná caja ñi'ya nu clyaa na ji'i quiy'a nu ntsu'u ji'na lo'o cha' bi'. Pana cua nda ycu'i Ndyosi caya' cha' tyu'ú na su lubii juani; si'i cñi plata laca cha' bi', ni si'i cñi oro laca nu nda Ni, cha' si cñi laca bi' ni, quiñu'u bi' masi chalyuu juani ti. ¹⁹Nu lo'o ngujuii Cristo lo crusi lo'o ndyalú tañi ycu'i, li' nda Ni caya' loo quiy'a nu ntsu'u ji'na, cha' ngua Cristo ñi'ya nti' sca msta lu'ú nu xcui' na

tso'o, nu xcui' na lubii; lo'o nu tañi ycu'i Cristo bi' ni, bi' laca caya' nu ngua'ni lyaá ji'na.

²⁰Tya clyo lo'o bilya cuiñá Ni chalyuu, cua jlo ti' ycu'i Ndyosi cha' ntsu'u cha' cua'ni Cristo cña tonu bi'; pana ngujuatya ycu'i Ni ni jacua' nu tyalaa tyempo bi'. Li' ñaa Cristo, ngua'ni yu cña bi' cuentya ji'na, cha' tyacua cha' tso'o bi' ji'na. ²¹Xqui'ya Cristo, bi' cha' jlya ti' mā ji'i ycu'i Ndyosi, cha' cua ngua'ni ycu'i Ni cha' ndyu'ú Cristo chaca quiya' lo'o cua ngujuii yu. Lo'o li' nda ycu'i Ndyosi sca su tso'o su tyi'i Cristo, ca su tlyu su ntucua ycu'i Ni. Ngua'ni Cristo cña tonu bi', cha' taca xñi mā cha' ji'i ycu'i Ndyosi, lo'o li' taca tyu ti' mā cha' caca lcaa ña'a cha' nu nacui Ni cha' caca.

²²Xqui'ya cha' nxyucua Xtyi'i ycu'i Ndyosi ji'i mā, na cua ndaquiya' mā ji'i cha' liñi nu nda ycu'i Ndyosi lo'o na, bi' cha' ngua lubii cresiya ji'i mā; juani taca caca tso'o tyiquee mā ña'a mā ji'i tya'a ñati mā. Pana tyucui tyiquee mā ntsu'u cha' caca tso'o tyiquee mā ña'a mā ji'i tya'a ñati mā, si'i ñi'ya ndu'ni ngu' nu ntsu'u tucua cha' tyiquee ngu' cua'ni cu'ma. ²³Laca mā ñi'ya si cua ngula mā chaca quiya', pana si'i ñi'ya nu ngula ti mā ji'i xtya'a mā; cua ngua cucui cresiya ji'i mā xqui'ya cha' nduna mā cha' nu nechui' ycu'i Ndyosi nu lu'ú ca, ycu'i Ndyosi nu ná nscua cha' cajaa Ni tsiya' ti. ²⁴Ndi'ya nscua cha' lo quityi ji'i ycu'i Ndyosi: Ñi'ya laca quixi', jua'a laca ñati chalyuu.

Lcaa na nu tso'o ña'a nu ntsu'u ji'i ñati laca ñi'ya nti' sca queé nu ndyu'ú ne' quixi' ti;

ndyanaa quixi' bi', li' ndye queé
bi', ngüityi tsiya' ti.

Lo'o jua'a laca lo'o ñati lo'o lcaa
cha' tso'o nu ntsu'u ji'i ngu'
nde chalyuu,

tye cha' tso'o bi' ji'i ngu' stu'ba
ti lo'o ycu'i' ngu'.

²⁵ Pana scaa cha' nu nchcui' ycu'i'

Ndyosi ni, tyanu cha' bi';

ná quiñu'u cha' bi' tsiya' ti.

Jua'a nacui' quityi bi'. Lo'o jua'a
nu cha' tso'o ji'i ycu'i' Ndyosi nu
ngulu'u ya ji'i ma, la cui' cha' bi'
laca nu ná quiñu'u tsiya' ti.

2 Lo'o cu'ma ni, nga'a cha' xtyanu
ma ji'i lcaa cha' cuxi nu ntsu'u
tyiquee ma ña'a ma ji'i tya'a ñati
ma: nga'aa cñilo'o ma ji'i tya'a ma,
nga'aa si'i tucua cha' tyu'u tyiquee
ma, nga'aa tyacui ti' ma ji'i sca na nu
ntsu'u ji'i tya'a ñati ma, nga'aa chcui'
ma cuentyu ji'i tya'a ñati ma. ²Ñi'ya
laca sca cubi' cuañi' nu ngula ca
ti, jua'a laca cu'ma cuentya ji'i ycu'i'
Ndyosi, cha' tsubi' ti ngusñi ma cha'
ji'i ycu'i' Ni. Lu'ba ti ntyi' cubi' cuañi'
cha' ntyute' tsa; si ná cati' lu'ba ti, ná
caluu cubi' tsiya' ti. Lo'o jua'a cu'ma
ni, tso'o la si cua'ni cña ti' ma cha' ca
tsa'a la ma cha' ji'i ycu'i' Ndyosi, cha'
ñi'ya nti' styi', jua'a laca cha' ji'i ycu'i'
Ndyosi cuentya ji'i ma. Cua'ni bi' cha'
caca nguula la ti' tyiquee ma cuentya
ji'i ycu'i' Ndyosi, cha' taca clyaá ma
ji'i cha' cuxi. ³Cua ndyo'o cuayá' ma
xi styi' bi', bi' cha' ngua cuayá' ti' ma
cha' tso'o tsa ntsu'u tyiquee nu Xu'na
na ña'a Ni ji'na.

**Laca Cristo ñi'ya nti' sca
quee nu ntucua quiya' ni'i**

⁴Ycu'i' Cristo nu Xu'na na ni, ñi'ya
nti' sca quee nu ntucua quiya' ni'i,

jua'a laca yu, masi na lu'ú ycu'i'.
Nacui' ñati chalyuu nu nti' cuiñá
ni'i cha' ná tso'o quee bi'; ná ca
cua'ni ngu' cña tso'o lo'o bi', nacui'
ngu'. Pana la cui' Jesús laca nu
cua ngusubi ycu'i' Ndyosi ji'i cha'
caca cña ji'i Ni, cha' tyucua yu ca
su ntucua quiya' cha', lcaa cha' nu
ntsu'u ji'i ycu'i' Ndyosi.

Bi' cha' nga'a cha' tyati tso'o
tyiquee ma cha' ji'i Cristo bi', ⁵cha'
lo'o cu'ma caca ma ñi'ya si laca
ma tyuu cha' tya' sca ni'i ji'i ycu'i'
Ndyosi, masi ña'a lu'ú ti ma. Li' xñi
ycui' Ni tyuu bi', cha' cuiñá Ni sca
ni'i nu tacati tsa cuentya ji'i ycu'i'
Ni. Chaca cha' ni, ñi'ya nti' sti jo'ó
nu lubii cresiya ji'i tsiya' ti, jua'a
caca lcaa cu'ma, cha' taca ji'i ma
sta ma msta slo ycu'i' Ndyosi juani
xqui'ya Jesucristo; nu msta bi' laca
ycui' ca ma, si chañi cha' tyucui
tyiquee ma nti' ma taquiya' ma ji'i
cha' nu nchcui' ycu'i' Ndyosi. ⁶Ndi'ya
nscua cha' lo quityi ji'i ycu'i' Ndyosi:

Ña'a ma yi'a. Cua ngusubi na'
ji'i sca ñati nu ndulo tsa cha'
ji'i, ñi'ya nti' sca quee tonu nu
quiña'a tsa nga'a, nacui' ycu'i'
Ndyosi.

Sta na' ji'i ñati bi' cha' caca
quee nu nscua quiya' ni'i 'na
nde quichi Sión.

Lcaa ngu' nu xñi cha' nu nchcui'
nu ñati bi', caca tso'o tyiquee
ngu' li';

cha' liñi tsiya' ti laca cha' nu
nchcui' ñati bi'.

Jua'a laca cha' nu nscua lo quityi bi'.

⁷Lo'o cu'ma ni, ndulo tsa cha' ji'i
quee bi' cuentya ji'i ma, cu'ma nu
ngusñi ma cha' ji'i ycu'i' Ndyosi;
pana cuxi tsa cha' caca ji'i ñati nu

ná jlya ti' ji'i ycu' Ndyosi tsiya' ti.
Ndi'ya nscua cha' lo quityi cha' ji'i
quee bi':

Cua ngxucuaa cuityi ni'i quee
tonu bi' clyo, cha' ná tso'o ña'a
quee bi' ngua ti' ngu';
pana juani cua ngujui cña nu
cua'ni quee bi', cha' ndu su
ndulo la cha' ji'i cuentya ji'i
ycui' Ndyosi.

⁸Ndi'ya nscua chaca cha' nu nchcui'
ji'i quee bi' chaca se'i lo quityi:

Tyeje sna quiya' ngu' chu' quee
bi', clyú ngu' tyucuii su lijya
ngu' lo'o tyucua quee bi'
quiya' ngu'.

Jua'a nscua cha' lo quityi bi'; na
nclyú ngu' tyucuii cha' ná ndaquiya'
ngu' ji'i cha' nu nchcui' ycu' Ndyosi.
Ngua'ni ycu' Ndyosi jua'a cha' ná
taca tya'a ngu' tyucuii ji'i Ni si ná
xñi ngu' cha' ji'i ycu' Ni.

**Ñati nu ntsu'u cha' ji'i
lo'o ycu' Ndyosi**

⁹Pana cu'ma ni, cua ngusubi
ycui' Ndyosi ji'i cu'ma cha' caca
ma ña'a tsaca taju ñati nu ndyu'ni
tlyu ji'i ycu' Ni. Laca ma ñi'ya
laca sca latya sti jo'ó nu cuentya
ji'i ycu' Ndyosi nu laca loo tsiya'
ti; ñi'ya tsaca taju ñati lubii laca
ma cha' cua'ni tlyu ma ji'i ycu'
Ndyosi lcaa tsā. Ndu'ni Ni lo'o ma:
“Ñati 'na laca ma”, nacu' Ni. Bi' cha'
nti' tsa Ni cha' chcu' ma lo'o lcaa
ñati lcaa ña'a cha' tso'o nu ngua'ni
ycui' Ndyosi lo'o ma; cua ngulo
Ni ji'i ma ji'i chalyuu cuxi su talya
tsa ña'a, cha' tya'a ma ca su ndubi
tsa xee ji'i ycu' Ni. ¹⁰Nu juani laca
ma ñati ji'i ycu' Ndyosi, masi nu
ngua tya tsubi' la ná ntsu'u cha' ji'i

ma lo'o ycu' Ndyosi tsiya' ti. Lo'o
jua'a cua nchca cuayá' ti' ma juani
cha' ndyu'ni tya'na tsa ti' Ni ji'i ma,
masi tya tsubi' la ná nchca cuayá' ti'
ma cha' ji'i ycu' Ndyosi tsiya' ti.

**Ndi'i na chalyuu cha' cua'ni
na cua ña'a ca cña ñi'ya nu nti'
ycui' Ndyosi cha' cua'ni na**

¹¹Cu'ma ngu' tya'a tso'o na, cua
nscua cha' tyi'i na ca slo ycu' Ni
tyempo ca nde loo la, bi' cha' nga'a
cha' tyi'i na chalyuu juani ñi'ya si
laca na ngu' tyijyu' nu ná ntsu'u
tyi ngu'. Lye tsa chcu' na' lo'o ma
juani cha' nga'aa cua'ni ma cua ña'a
ca cha' cuxi nu ndijña tyiquee ma
cha' cua'ni ma; nga'aa taquiya' ma
ji'i cha' cuxi bi', cha' jua'a nga'aa
caca ji'i nu cha' cuxi bi' cua'ni
ñu'u ji'i ma. ¹²Xcu' cha' liñi cua'ni
ma lacua; xcu' cha' tso'o cua'ni
ma, xqui'ya nu ñati nu ná jlya ti' ji'i
ycui' Ndyosi tsiya' ti, cha' lo'o ngu'
bi' taca ca cuayá' ti' ngu' cha' ñati
tso'o laca ma. Nu juani nti' ngu' bi'
cha' cuxi tsa ñati laca ma, bi' cha
tso'o la si cua'ni ma xcu' cha' tso'o
ti cha' ña'a ñati bi' ji'i ma; li' ta
ngu' bi' cuentya cha' chañi cha' ñati
tso'o laca ma. Lo'o ñati bi' cua'ni
tlyu ji'i ycu' Ndyosi tsā nu cua'ni
cuayá' Ni ji'i ñati li'.

¹³Xqui'ya Jesucristo nu Xu'na na
tucuá ma cha' ji'i lcaa ngu' nu laca
loo, masi rey nu laca loo tsiya' ti ji'i
nasiyu re, ¹⁴masi ngu' gobernador
nu laca cña cuentya ji'i rey bi'. Ngu'
nu laca gobernador ni, nchcube'
ngu' ji'i ñati nu ndyu'ni cha' cuxi,
lo'o jua'a ndu'ni chi' ngu' loo cua
ña'a ca ñati nu ndyu'ni cña tso'o.
¹⁵Pana nti' ycu' Ndyosi cha' cua'ni

ma xcuil' cña tso'o, nga'aa caca chcuil' ngu' cha' cuxi jil'i ma li'; masi nu ngu' nu ná nti' ca cuayá' ti', masi nu ngu' nu ná jlo ti' tsiya' ti, ni sca quiya' ná ntsu'u cha' sta ngu' bi' quiya' jil'i ma li'. ¹⁶Ñati nu ndi'i tso'o ti laca ma juani, pana ná tso'o si ná taquiya' ma jil'i ngu' nu laca loo lo yuu chalyuu; msu jil'i ycuil' Ndyosi laca ma juani, bi' cha' tso'o la si cua'ni ma cña nu cuentya jil'i ycuil' Ni lacua, cha' ña'a xa' ñati cha' ntsu'u cha' jil'i ma lo'o Ni. ¹⁷Tso'o si tucua' ma cha' nu nchcuil' lcaa ñati. Lo'o jua'a cua'ni ma cha' tso'o ti caca tyiquee ma ña'a ma jil'i lcaa ñati jil'i Cristo, cha' tya'a ma laca ngu' bi'. Ndu'ni cha' cutsii ma xi jil'i ycuil' Ndyosi, lo'o jua'a ndu'ni cha' cua'ni chi ma loo rey nu laca loo tsiya' ti chalyuu.

**Ñi'ya nu nga'a cha' cua'ni
ngu' msu lo'o xu'na ngu'**

¹⁸Cu'ma nu laca ma msu jil'i ñati ni, taquiya' tso'o ma cña jil'i xu'na ma, masi ndube ti' xu'na ma jil'i ma xqui'ya cha' tso'o tyiquee ngu' ña'a ngu' jil'i ma, masi xña'a tyiquee ngu' ña'a ngu' jil'i ma. ¹⁹Tso'o tsa ndyu'ni sca msu nu laca ñati jil'i ycuil' Ndyosi, nu lo'o ndalo tyiquee msu bi' jil'i xu'na yu, masi xña'a tsa xu'na yu, masi cha' laja ti xcube' xu'na yu jil'i yu. ²⁰Si quiji'i xu'na msu jil'i sca msu jil'i xqui'ya cha' ngua'ni msu bi' sca cha' cuxi, ná sca cha' laca li'; nga'a cha' chcube' msu bi'. Pana cuentya jil'i ycuil' Ndyosi, tso'o tsa ndu'ni sca msu si talo tyiquee msu bi' lo'o xcube' xu'na yu jil'i yu laja ti, nu lo'o tso'o tsa ndaquiya' msu bi' jil'i cña

jil'i xu'na yu. ²¹Tya lo'o ngusubi Ni jil'i ma, tya li' jlo ti' Ni cha' jua'a xcube' ngu' jil'i ma, cha' la cui' jua'a nguxcube' ngu' jil'i ycuil' Cristo tya clyo la cuentya jil'i cu'ma. Jua'a ngua cha' ngulu'u Cristo jil'i ma ñi'ya caca talo tyiquee ma lo'o xcube' ngu' jil'i ma. ²²Ná ntsu'u ni sca quiya' jil'i nu Cristo bi', ni sca cha' cui'ni ná nchcuil' yu; ²³masi nchcuil' ngu' cha' suba' lo'o yu, ni sca cha' tyaala ná nguxacu' yu jil'i ngu'; nguxcube' tsa ngu' jil'i yu, pana ná ngua ñasi' yu jil'i ngu' li'. Sca ti lo'o ycuil' Ndyosi Sti yu nchcuil' yu jil'i cha' cuxi nu ndyu'ni ngu' lo'o, cha' sca ti ycuil' Ni laca nu xcuil' li'ni ndu'ni cuaya' jil'i ñati. ²⁴Ycuil' Cristo laca nu sca ti quiya' ngujui'i ca'a ngu' jil'i lo crusi cha' taca cuityi Ni quiya' nu ntsu'u jil'i lcaa na, cha' clyaa na jil'i quiya' nu ntsu'u ji'na; bi' cha' cuentya jil'i Cristo taca tyi'i na chalyuu juani, cha' jua'a tyaja'a na cua'ni na xcuil' cha' tso'o nu nti' ycuil' nu Xu'na na cha' cua'ni na. Xqui'ya cha' nchcube' ycuil' Cristo, bi' cha' ngua ti cha' cuxi nu ntsu'u tyiquee na, ñi'ya nti' lo'o ngua ti cha' quicha na lo'o ndyaca tso'o na. ²⁵Lo'o juani nga'aa ndya'a yu'u ti ma, ñi'ya ndya'a yu'u xly'a; na cua nguxtyuu ma ñaa ma ca su nga'a ycuil' nu Xu'na ma nu ña'asii jil'i cresiya jil'i ma.

Ñi'ya ntsu'u cha' tyi'i ñati lo'o clyo'o

3 Lo'o jua'a cu'ma ngu' cuna'a ni, ntsu'u cha' taquiya' ma jil'i cha' nu nchcuil' clyo'o ma, cha' nu qui'yu laca loo jil'i nu cuna'a, masi tya lyiji taquiya' nu qui'yu bi' jil'i ycuil' Ni. Pana lo'o ña'a nu ngu' qui'yu

clyo'o mā lcaa cha' tso'o nu ndu'ni mā, li' xñi ngu' cha' jil'i ycu'i Ni, masi bilya chcu'i mā lo'o ngu' jil'i cha' bi'; ²lo'o ña'a clyo'o mā cha' nduna mā cha' nu nchcu'i ycu'i ngu' lo'o mā, cha' lubii cresiya jil'i mā, ná tyiquee' taquiya' ngu' bi' jil'i cha' liñi jil'i ycu'i Ndyosi li'. ³Lcaa cu'ma ngu' cuna'a ni, tso'o si ña'asii mā jil'i quicha' hique mā; pana ná nti' cha' culiji quiña'a tsa hora jil'i mā, ni ná nti' cha' culiji quiña'a tsa cñi jil'i mā, cha' cua'ni cho'o mā quicha' hique mā. Ná ntsu'u cha' tyacui chcu'a jyaca mā nu quiña'a tsa ntsu'u loo, ni ná ntsu'u cha' cacu' mā late' nu quiña'a tsa nga'a. Si'i na cacu' nu cuna'a nu cua'ni cha' ndiya la ti' ngu' jil'i. ⁴Pana ycu'i Ndyosi ndiya la ti' jil'i nu cuna'a nu tso'o tsa cha' ntsu'u tyiquee ngu'; si ná liye' ti' ngu', si ná tyaaala ngu', bi' laca ngu' cuna'a nu ndiya ti' ycu'i Ndyosi ña'a Ni jil'i. Ñi'ya laca sca na nu tso'o tsa ña'a, nu quiña'a tsa nga'a, jua'a laca ngu' cuna'a nu ná cuxi tyiquee tsiya' ti cuentya jil'i ycu'i Ni. ⁵Ná cuxi tyiquee tsiya' ti jyo'o ma' cusu' nu ntsu'u cha' jil'i lo'o ycu'i Ndyosi nu ngua cua sa'ni. Tso'o tsa ña'a ma' cusu' bi', cha' ngua'ni tlyu ma' jil'i ycu'i Ni, lo'o jua'a ndaquiya' ma' jil'i cha' nu nchcu'i clyo'o ma'. ⁶Jyo'o ma' Sara ngua'ni ma' jua'a, cha' ndaquiya' ma' bi' jil'i jyo'o Abraham nu ngua clyo'o ma'; “xu'na na”, nacui ma' bi' jil'i. Lo'o cu'ma ni, ñi'ya si laca mā sñi' ma' Sara bi', jua'a laca cu'ma ngu' cuna'a juani, si xcui' cha' tso'o ndu'ni mā. Nga'aa ntsu'u cha' cutsii mā, nga'aa ntsu'u cha' culacua tsa ti' mā li'.

⁷Lo'o jua'a cu'ma ngu' qui'yu ni, tso'o ti tyi'i mā lo'o clyo'o mā,

cua'ni tyaca'a mā jil'i clyo'o mā; masi xtyi la juersa ntsu'u jil'i nu cuna'a, pana stu'ba ti laca tyucuaa mā cuentya jil'i ycu'i Ndyosi, cha' cua nda Ni chalyuu nu ná nga'a cha' tye jil'i tyucuaa mā. Si cua'ni mā tso'o jua'a, tso'o ti tyi'i mā to' tyi mā; li' ná caja sca cha' cuxi nu cua'a jil'i mā, nu cua'ni cha' ná chcu'i mā lo'o ycu'i Ndyosi.

Ñi'ya nu chcube' ngu', masi xcui' cha' tso'o ndu'ni ngu'

⁸Lcaa cu'ma ni, nga'a cha' caca stu'ba tyiquee mā lo'o tya'a mā, cha' tya'a ngusñi mā cha' jil'i Cristo laca mā; nga'a cha' cube ti' mā jil'i tya'a mā, nga'a cha' cua'ni tyaca'a mā jil'i lcaa tya'a mā. Lo'o jua'a cua'ni tya'na ti' mā jil'i tya'a mā, ná cua'ni liye' ti' mā ña'a mā jil'i ngu' bi'. ⁹Ná cua'ni cuxi mā lo'o tya'a ñati mā, masi ngua'ni cuxi ngu' lo'o mā; lo'o jua'a ná chcu'i tyaaala mā lo'o tya'a ñati mā, masi tyaaala tsa nchcu'i ngu' lo'o mā. Na cua ngusubi ycu'i Ni jil'i mā cha' xtyucua Ni jil'i cu'ma, bi' cha' tso'o la si chcu'i mā lo'o ycu'i Ndyosi cha' xtyucua Ni jil'i ngu' tyaaala bi'. ¹⁰Ndi'ya nscua cha' lo quityi jil'i ycu'i Ndyosi:

Lcaa ngu' nu nti' caja chalyuu tso'o jil'i ngu', cha' ca chaa ti' ngu',
nga'a cha' cua'a ngu' bi' jil'i ycu'i ca ngu' cha' ná chcu'i ngu' cha' cuxi;
la cui' jua'a ná tso'o si tyu'u cha' cuiñi tu'ba ngu' bi'.

¹¹Ntsu'u cha' tyaaatsu' ngu' bi' jil'i lcaa cha' cuxi nu ntsu'u jil'i ngu', cha' nga'aa cua'ni ngu' cha' cuxi bi'.

Xcui' cha' tso'o ntsu'u cha'
cua'ni ngu' bi'.

Lo'o li' ntsu'u cha' xtyucua ngu'
bi' ji'i tya'a ñati ngu' lcaa tsa,
xqui'ya cha' tso'o ntsu'u tyiquee
ngu' bi' ña'a ngu' ji'i tya'a ñati
ngu'; jua'a nga'aa xuu tya'a
ngu' bi' li'.

¹²Tso'o la si jua'a cua'ni ngu';
cua'ni tyaca'a ycu' nu Xu'na
na ji'i nu ñati nu tso'o tyiquee
bi' li',
cuna Ni lo'o chcu' ngu' bi' lo'o
Ni.

Pana lye tyi'i loo Ni ña'a Ni ji'i
ñati nu xña'a tyiquee.

Jua'a nchcu' lo quityi bi'.

¹³Ná ntsu'u cha' cua'ni cuxi ngu'
lo'o mā, si xcui' cha' tso'o ti cua'ni
mā. ¹⁴Pana si ntsu'u quiya' nu
cua'ni lya' ti' ngu' ji'i mā xqui'ya
sca cha' tso'o nu ndyu'ni mā, tso'o
la si ná caca xñi'i ti' tyiquee mā li';
ná cube ti' mā, ná cutsii mā ji'i ngu'
bi'. ¹⁵Tyucui tyiquee mā cua'ni tlyu
mā ji'i Cristo, cha' chañi cha' laca
Ni nu Xu'na na. Lo'o jua'a culacua
xi ti' mā ñi'ya caca xacu' mā cha' ji'i
ngu' lo'o xcuane ngu' ji'i mā ndi'ya:
¿Ni cha' laca ndu ti' mā ji'i nu Cristo
bi'? Tso'o ti xacu' mā cha' ji'i ngu'
bi', ná cua'ni tyixi mā lo'o ngu' bi'.

¹⁶Xcui' cha' tso'o cua'ni mā lo'o ngu'
lacua, cha' taca tyanu lubii cresiya
ji'i mā; li' caca tyuju'u ti' nu ngu'
cuiñi bi', ngu' nu nchcu' cuentyu ji'i
mā xqui'ya cha' tso'o nu ndyu'ni mā
cuentya ji'i Cristo. ¹⁷Si ntsu'u cha'
chcube' na, tso'o la xcube' ngu' ji'na
xqui'ya sca cha' tso'o nu ndyu'ni na,
si ta ycu' Ndyosi chacuayá' ji'i ngu';
pana si ngua'ni na sca cha' cuxi, liñi
tsa ndyu'u cha' si xcube' ngu' ji'na li'.

¹⁸Ycui' Cristo ngujuui xqui'ya
qui'ya nu ntsu'u ji'na, masi lubii
tsiya' ti cresiya ji'i yu; nchcube' yu
cuentya ji'na, cha' cuxi tsa tyiquee
na. Lo'o juani taca tyalaa na slo
ycui' Ndyosi xqui'ya nu Cristo bi'.
Sca ti quiya' ngua cha' ti' bi' ji'i
Cristo, ndye cña ji'i yu nde loyuu
chalyuu li'. Ndyujui ngu' ji'i nu ñati
nu naa Jesucristo bi', pana ngua'ni
Xtyi'i ycu' Ndyosi cha' ndyu'ú yu
chaca quiya'. ¹⁹Xtyi'i ycu' Cristo
ngua nu ndyaa ne' ni'i chcu' su
ntsu'u ngu' jyo'o ca bilyaa, cha'
chcu' Ni lo'o ngu' jyo'o bi'. ²⁰Ná
ntaja'a ngu', ná ndaquiya' ngu'
jyo'o bi' ji'i ycu' Ndyosi cua sa'ni
la lo'o nguti'i ngu' chalyuu. Ntsu'u
xi ngu' jyo'o bi' nu nguti'i tyempo
lo'o ngüiñá jyo'o Noé yaca ni'i bi'.
Ngujuatya ycu' Ndyosi ji'i ngu' bi',
ngua ti' Ni cha' taquiya' ngu' bi' ji'i
Ni, lo'o ná ntaja'a ngu' bi' tsiya' ti;
bi' cha' snu' tya'a ti ñati ngulaá ne'
yaca ni'i bi' lo'o ngua'ya tyo clyaa
tyempo bi'. ²¹Ñi'ya nu ngua'ni lyaá
Ni ji'i ngu' nu nguta'a ne' yaca ni'i
bi' lo hitya nu ngua sa'ni la, cha'
ndaquiya' ngu' bi' ji'i cha' nu nchcu'
ycui' Ni; jua'a clyaa mā juani,
cha' cua ndaquiya' mā ji'i cha' nu
nchcu' Ni. Cua ndyaa mā lo hitya
cha' tyucuatya mā li'. Si'i na caata
ti na chcu laca cha' bi', si'i cha' cuu'
cuaña' na, bi' cha' tyucuatya na
li'; ndi'ya laca cha': na cua ndijña
na ji'i ycu' Ndyosi cha' cua'ni lubii
Ni ji'i cresiya ji'na xqui'ya cha' cua
ndyu'ú Jesucristo chaca quiya', bi'
cha' ntyucuatya na. ²²Na cua ndyaa
Jesucristo nde cua, lo'o juani ndi'i
yu la'a tsu' cu' ca su ntucua ycu'
Ndyosi. Nu Jesucristo bi' ni, laca yu

loo ji'lí lcaa xca ji'lí ycuí' Ndyosi, ji'lí lcaa ngu' nu laca cña, ji'lí lcaa cui'lí tso'o nu nchca xi ji'lí; laca yu loo tsiya' ti.

Cua'ni na cua ña'a ca cña ji'lí ycuí' Ndyosi nu nchca ji'na

4 Lo'o ndyi'u ti' mā cha' nchcube' Cristo nde chalyuu, li' caca nguula la ti' mā cha' talo tyiquee mā lo'o chcube' cu'mā; ñi'ya nu ndalo tyiquee ycuí' Cristo, jua'a taca talo tyiquee mā lo'o chcube' mā li'. Nga'aa caca cua'ni cha' cuxi ngana ji'lí mā si lo'o cu'mā chcube' mā jua'a. ²Lo'o li' nu cha' cuxi nu ndiya ti' ñati chalyuu ni, nga'aa si'i cha' bi' nu caca loo ji'lí mā lcaa tsā lo'o ndi'lí mā chalyuu; xcui' cña nu ndiya ti' ycuí' Ndyosi cha' cua'ni mā, bi' laca cña nu cua'ni mā, cha' sca ti ycuí' Ndyosi caca loo ji'lí mā li'. ³Tyempo nu nteje tacui, cua ngua'ni mā lcaa cha' cuxi ñi'ya nu ndiya ti' ñati nu ná ntsu'u cha' ji'lí lo'o ycuí' Ndyosi tsiya' ti. Cuayá' tsa lo cua ti cha' cuxi: bi' cha' nga'aa cua'ni suba' mā lo'o tya'a ñati mā juani, nga'aa cua'ni mā lcaa lo cha' cuxi nu ndiya ti' mā cua sa'ni la; nga'aa caca cu'bi mā, nga'aa tyeje tacui mā cuayá' cacu mā, co'o mā, ñi'ya nu ndyu'ni ngu' nu ná ndube ti' lo'o ndya'a ngu' bi' ta'a; nga'aa cua'ni tlyu mā ji'lí lcui jo'ó, cha' suba' tsa cha' bi' cuentya ji'lí ycuí' Ndyosi. ⁴Ngua'ni mā cha' cuxi jua'a cua tsubi' la; lo'o juani nu ñati nu ngua tya'a tso'o mā nquicha', ndube tsa ti' ngu' cha' nga'aa nti' mā cua'ni mā cua ña'a ca cha' cuxi nu ngua'ni mā cua tsubi' la. Ná nchca cuayá' ti' ñati bi' ni cha' laca nga'aa

ndu'ni mā jua'a, bi' cha' nchcui' ngu' bi' cuentyu ji'lí mā juani. ⁵Pana ná cube ti' mā, ntsu'u cha' xacui' ngu' bi' cha' ji'lí ycuí' Ndyosi cuentya ji'lí cha' cuxi nu ndu'ni ngu' chalyuu. Cua ngulala ti tyalaa tsā nu cua'ni cuayá' Ni ji'lí lcaa ñati, masi ngu' jyo'o, masi ngu' nu tya ndi'lí chalyuu. ⁶Lo'o jua'a ngu' nu cua ngujui, nu cua ndyuna cha' tso'o ji'lí Jesucristo, ñati chalyuu ti ngua ngu' bi', bi' cha' ngujui ngu', ñi'ya nu nscua cha' cajaa lcaa ñati; pana cua'ni Xtyi'i ycuí' Ndyosi cha' tyu'ú ngu' bi' chaca quiya', cha' caja chalyuu nu ná nga'a cha' tye ji'i ngu' bi', cha' cua ngusñi ngu' cha' ji'lí Jesús.

⁷Cua tye ti cha' ji'lí lcaa na nu ntsu'u chalyuu; bi' cha' tso'o la si cua'a mā ji'lí ycuí' ca mā, tii ti ti' mā tyi'i mā chalyuu cha' taca cua'ni mā cña tso'o, cha' lu'ba ti taca chcui' mā lo'o ycuí' Ndyosi. ⁸Nu cha' nu ndulo tsa cha' cua'ni mā ni, bi' laca cha' xcui' tso'o caca tyiquee mā ña'a mā ji'lí tya'a ñati mā. Lo'o si jua'a nti' na ña'a na ji'lí tya'a na, ndyu'ni clyu ti' na ji'lí quiy'a nu ntsu'u ji'lí tya'a na li'. ⁹Ta mā xi to' tyi mā su tyi'i tya'a mā, lo'o jua'a ta mā na cacu ngu' lo'o tyalaa ngu' bi' slo mā; ná chcui' mā cha' ti'f ji'lí tya'a mā xqui'ya cha' ndyalaa ngu' slo mā. ¹⁰Nda xlya'be ti ycuí' Ndyosi ñi'ya taca cua'ni scaa mā sca cña tso'o, lcaa mā nu ngusñi mā cha' ji'lí Jesús. Ñi'ya lo'o nxyucua ycuí' Ndyosi ji'na cha' caca tya'na ti' na ji'lí tya'a ñati na, la cui' jua'a nga'a cha' xtyucua na ji'lí ngu' lo'o cua'ni na cña nu nda Ni cha' cua'ni sa scaa na. ¹¹Culu'u mā cha' ji'lí ñati, si bi'

laca cña nu cua nda Ni ji'i mā cha' cua'ni mā; culu'u mā tsa ña'a cha' nu nti' ycu'i Ndyosi chcu'i Ni lo'o ngu'. Lo'o jua'a xtyucua mā ji'i tya'a ñati mā lo'o tyucui juersa nu nda ycu'i Ndyosi ji'i mā, si bi' laca cña nu cua nda Ni ji'i mā cha' cua'ni mā. Nu lo'o ña'a ngu' cña tso'o nu ndyu'ni mā bi', li' cua'ni tlyu ngu' ji'i ycu'i Ndyosi xqui'ya Jesucristo. Lo'o li' ná nga'a cha' tye cha' cua'ni tlyu ngu' ji'i Cristo bi', cha' laca Cristo loo tsiya' ti. Jua'a caca cha' tu'ni.

**Ntsu'u cha' tyacua cha' ti'i ji'i ñati
nu ntsu'u cha' ji'i lo'o Jesucristo**

¹²Cu'mā tya'a tso'o na, masi lye tsa cua'ni lya' ti' ñati ji'i mā, ñi'ya nti' si ntsu'u mā ndyaqui mā lo quii', ná ntsu'u cha' cube tsa ti' mā; ná tso'o si culacua tsa ti' mā li', ñi'ya si ná tso'o tyacua cha' cuxi ji'i mā, nti' mā. Jua'a li' nechca cuayá' ti' Ni si chañi cha' ntsu'u cha' ji'i mā lo'o Ni, si ná chañi cha' bi'. ¹³Nga'a cha' caca tso'o tyiquee mā lo'o tyi'u ti' mā cha' ñi'ya ngua lya' ti' ngu' ji'i ycu'i Cristo, jua'a ca lya' ti' ngu' ji'i cu'mā juani. Tlyu tsa laca Cristo cuentya ji'i ycu'i Ndyosi, lye tsa quiji'i xee ji'i Ni lo'o caa ycu'i Cristo chaca quiya' nde loo la; li' ca chaa la ti' mā, ca tso'o la tyiquee mā.

¹⁴Nu lo'o nechui' ngu' cha' ti'i ji'i mā xqui'ya Cristo, ca tso'o tyiquee mā cha' ndi'i Xtyi'i ycu'i Ndyosi lo'o mā, lo'o jua'a tlyu tsa cha' tso'o ntsu'u ji'i ycu'i Ni. Nchcui' ngu' bi' cha' cuxi ji'i ycu'i Ndyosi; pana cu'mā ni, tso'o tsa si tya cua'ni tlyu mā ji'i Ni. ¹⁵Ná tso'o tsiya' ti si cua'ni mā cha' cuxi. Liñi tsa laca si chcube' ngu' nu lo'o cua'ni ngu' cha' cuxi;

masi cujuui ngu' ji'i tya'a ñati, masi cuaana ngu' na nu ntsu'u ji'i tya'a ñati, masi cua'ni ngu' xa' lo cha' cuxi nu ná ntsu'u chacuayá' cua'ni ngu', masi xu'u tya'a ngu' lo'o ngu' nu laca loo, liñi tsa si chcube' ngu' bi'. ¹⁶Pana ná ntsu'u cha' ca tyuju'u ti' mā si xcube' ngu' ji'i mā cha' laca mā ñati ji'i Jesucristo; cua'ni tlyu mā ji'i ycu'i Ndyosi cha' jua'a ndyaca ji'i mā li'.

¹⁷Cua ndyalaa hora cha' xana cua'ni cuayá' Ni ji'i lcaa ñati, pana clyo nguxana Ni lo'o ñati nu ji'i ycu'i Ni; bi' cha' laca si ntsu'u xi cha' ti'i ji'na juani lo'o nguxana ca ti Ni ndyu'ni cuayá' Ni ji'i ñati, caca cuayá' ti' na cha' tlyu la cha' caca lo'o chcube' ngu' cuxi nde loo la. Li' chcube' ñati nu ná ntaja'a taquiya' ji'i cha' tso'o nu ji'i ycu'i Ndyosi.

¹⁸Tucui tsa cha' laca cha' clyaa ñati nu ndu'ni cha' tso'o ti; pana nu ñati xña'a, lo'o jua'a ñati nu ntsu'u cha' cuxi ji'i ni, tye cha' ji'i ngu' bi' tsiya' ti. ¹⁹Ndyiji xi cha' ti'i ji'i mā juani chacuayá' ji'i ycu'i Ndyosi. Cua jlo ti' Ni cha' bi', pana ná culati'i Ni ji'na si jua'a. Ntsu'u cha' tya cua'ni na xcui' cha' tso'o, cha' ña'a ti xñi na cha' ji'i ycu'i Ni nu ngüiñá lcaa lo na, masi nechcube' na; chañi cha' cña'asii Ni ji'na li'.

**Cuii nu nda Pedro lo'o ñati tya'a
ngusñi cha' ji'i Jesucristo**

5 Sca ngu' cusu' nu laca loo laca na', lo'o juani nti' na' ta na' sca cuii lo'o cu'mā tya'a cusu' na. Lo'o na', cua na'a na' ji'i Cristo lo'o nguxcube' ngu' ji'i yu, bi' cha' jlo ti' na' cha' stu'ba ti tyi'i lcaa tya'a na ca slo ycu'i Ndyosi; ña'a na cha'

tlyu nu caca li'. ²Ntsu'u cha' ña'asii tso'o mā jil'i lcaa ngu' tya'a mā, ña'a taju ngu' tya'a mā ca su laca mā loo jil'i ngu'. Ñi'ya nti' xlya', jua'a laca ngu' bi'; ñi'ya nti' ñati nu ña'asii jil'i xlya', jua'a laca na, ngu' cusu' tya'a na. Nga'a cha' xtyucua na jil'i ngu' tya'a na cha' tyanu tachaa la cha' jil'i Cristo tyiquee ngu'. Tyucui tyiquee mā cua'ni mā cña bi', cha' jua'a nti' ycuil' Ndyosi cha' cua'ni na; ná tso'o si ntsu'u cha' tatsaa ngu' tya'a mā jil'i mā cha' cua'ni mā cña bi'. Lo'o jua'a ná tso'o si quiña'a tsa caya' xñi mā jil'i ngu' cha' cua'ni mā cña bi', pana tso'o la si tyucui tyiquee mā cua'ni mā cña bi' cuentya jil'i ycuil' Ndyosi. ³Ná laca mā xu'na ngu' tya'a mā, bi' cha' tso'o ti cua'ni mā slo ngu', cha' taca ca cuayá' ti' xa' la ngu' tya'a mā ñi'ya nu ntsu'u cha' cua'ni ngu'. ⁴Nu lo'o tyu'u tucua ycuil' nu Xu'na na, li' ta Ni na tso'o nu tyacua jil'i mā. Ná nga'a cha' tye tsiya' ti na nu ta Ni jil'i lcaa na nu ntsu'u cña ji'na cha' ña'asii na jil'i taju ñati jil'i Ni; si'i ñi'ya nti' ngana nu caja ji'na lo'o ndyu'ni na cña nde chalyuu nu yala ti tye bi'.

⁵Lo'o jua'a cu'mā ngu' cuañi' ni, ta na' sca cuii lo'o mā. Taquiya' mā jil'i cha' nu nchcui' ngu' cusu' nu laca loo jil'i mā. Lo'o jua'a ntsu'u cha' xtyucua mā jil'i tya'a ñati mā, cha' ná tso'o cua'ni tyucuaa ti' mā jil'i ngu' bi'. Ndi'ya nscua cha' lo quityi jil'i ycuil' Ndyosi:

Xuu tya'a ycuil' Ndyosi lo'o ñati nu ndu'ni tyucuaa ti' jil'i tya'a ñati, pana xtyucua tsa Ni jil'i ñati nu xti ti cha' ntsu'u tyiquee ngu' cuentya jil'i ycuil' ca ngu'.

⁶Bi' cha' taquiya' mā jil'i cha' nu nchcui' ycuil' Ndyosi nu laca loo tsiya' ti, cha' ná cua'ni tyucuaa ti' mā jil'i tya'a ñati mā; cua' jlo ti' ycuil' Ni ni tsā laca nu lo'o cua'ni Ni cha' caca mā ñati tlyu la. ⁷Cacha' mā jil'i ycuil' Ni lcaa cha' nu nelyacua tsa ti' mā jil'i, lo'o li' cua'ni Ni cha' nga'aa cube ti' mā jil'i cha' bi'. Chañi cha' ndube ti' ycuil' Ni ña'a Ni jil'i cu'mā.

⁸iTii ti ti' mā tyil'i mā chalyuu! Ná caja' mā, cha' tya'a cusuu mā laca ycuil' nu xña'a, lo'o jua'a cacua tsa ndu' bi' slo mā. Ñi'ya nti' sca cuichi nu tyaalā tsa nu nelyana jil'i sca ñati cha' cacu ni', jua'a nti' ndya'a yu'u nu xña'a bi' chalyuu. ⁹Xñi tso'o mā cha' jil'i ycuil' Ndyosi cha' caca nguula ti' tyiquee mā; li' ná ta mā chacuayá' tyijiloo nu xña'a bi' jil'i mā. Jlo ti' na cha' sca ti cuayá' ndyacua cha' ti' jil'i lcaa tya'a na tyucui ña'a chalyuu. ¹⁰Pana xti ti tsā tyacua cha' ti' jil'i mā. Lo'o tye tsā nu nchcube' mā, li' cua'ni ycuil' Ndyosi cha' caca tso'o mā, cua'ni Ni cha' caca nguula ti' tyiquee mā chaca quiya'; ta Ni juersa jil'i mā, cha' xcui' tso'o tsa ndu'ni ycuil' Ni lo'o na. Xqui'ya Cristo cua ngusubi Ni ji'na cha' taca tyi'i na ca su tlyu su ntucua ycuil' Ni. ¹¹Ná nga'a cha' tye tsā nu cua'ni tlyu na jil'i ycuil' Ndyosi li', cha' laca Ni loo tsiya' ti. Jua'a caca cha' tu'ni.

Nchcui' salya' Pedro lo'o ngu'

¹²Jlo ti' na' cha' tso'o tsa ngusñi Silvano tya'a na cha' jil'i ycuil' nu Xu'na na; yu bi' laca nu nguxtyucua tsa 'na lo'o nguscua ya quityi sube re cha' cā slo cu'mā. Nti' na' cha' caca nguula ti' tyiquee mā, cha' chañi cha' tlyu tsa cha' tso'o ndu'ni

ycui' Ni lo'o na. Jlo ti' na' cha' bi',
lo'o jua'a tso'o tsa si lo'o cu'ma
tyi'u ti' ma cha' bi', ñi'ya laca lo'o
nxyucua tsa ycu' Ni ji'na lcaa tsā.

¹³Ña'a tsaca taju ñati ji'i
Jesucristo nde Babilonia re nda
ngu' xlyo ni'i ji'i ma. Ngu' tya'a
na laca ngu' bi', cha' lo'o tyucui
taju ngu' bi', ngusubi ycu' Ndyosi
ji'i ngu' cha' caca ngu' ñati ji'i Ni.

“Xlyo ni'i”, nacui Marcos ji'i cu'ma,
nu Marcos nu laca ñi'ya nti' sca sñi'
na'. ¹⁴Chcuicha' ma ji'i lcaa ngu'
tya'a ma; quityi ma ji'i tya'a ma
cuentya jna', cha' chañi cha' tso'o
ntsu'u tyiquee na ña'a na ji'i tya'a
na.

Cua'ni Ni cha' ti ti tyi'i cresiya
ji'i lcaa cu'ma nu ntsu'u cha' ji'i ma
lo'o Cristo.